

四庫全書

史部

欽定四庫全書

幸魯盛典卷八

上出大成門問漢碑所在衍聖公孔毓圻奏曰漢碑在

奎文閣前因引

駕過唐碑亭觀唐乾封碑

上嘉賞前至奎文閣衍聖公孔毓圻奏曰此閣乃藏歷

代書籍之所

皇上頒賜之書皆謹藏其上

附錄 唐乾封元年贈泰師魯國孔宣公碑文

曰臣聞彤氣肇分宗匠之塗遂廣性情已著名
教之理攸興是故雕刻為妙物之先粉澤成真
宰之用若其聃語棄智則聖非攘臂之端莊寄
齊諧則禮必因心之範雖九流爭長百家競逐
而宗旨所歸典墳攸繫夫軒義已謝子姒迭微
步驟殊方質文異轍及流簞起譟箕服傳詆憲
章板蕩風雅淪喪然而千齡接聖崇朝可期五

百見賢伐柯未遠粵唯上哲降生圯運理接化
先德克造物財成教義彌綸之跡已周組織心
靈範圍之功且峻利仁以濟幽顯垂訓以雷動
植自嘆起臨川道窮反袂西峯琰玉幾燼蒼山
東野柔桑多塵碧海屬混元再造休明一期雅
頌之音復聞郊禋之禮還緝跨巢胥之逸軌
邁龍鳥之遐風瞻白雲而升介邱翼蒼螭而
過沂上而令千祀之外典冊遂隆九泉之下哀

榮方縟斯乃命爲罕說道不預謀豈如箕山之
魂空成寂寞信陵之墓徒復經過將知龍蛇之
蟄潛契於天壤聖智所遊高懸於日月言不可
極其惟孔泰師乎泰師諱邱字仲尼魯國鄒人
有殷之苗裔也分於宋則孔父嘉爲大司馬弗
父何以國讓其弟厲公正考父佐戴武宣而受
三命居於魯則有防叔伯夏叔梁紇紇生泰師
若夫天命元鳥玉篚隆其濬哲瑞啟白狼瑤臺

繁其錫類武王覆夏仍遷象物之金有客在周
復奏桑林之樂滋恭喻尸臣之鼎高讓挹延吳
之風令緒昌源煥乎已遠至如象緯凝質則傳
說巫咸嵩華降神而申伯吉甫在於郊臨巨蹟
鬱符中野之祥水帶邱阿遙均返宇之慶韞乾
坤之精粹陶陰陽之淑靈度九圍十河目海口
放勳文命有喻於儀型子產臯繇微詳於具體
孟孫言其將聖太宰辨其多能神關繫表性與

道合時初撰屨已訓魯鄉年未裘裳先窺周室
猶且學期上達業遵下問龍如藏史或訪禮經
碧淮萇弘言詢易象曲臺相圃廣陳揖讓之容
師摯師襄屢辨興亡之極網羅六藝經緯十倫
加以思入無方情該至蹟陳庭天集懸驗遠飛
季井泉開冥占幽怪新萍泛日能對於楚賓舊
骨淪風旋訓於吳使藏往知來之際微妙元通
之旨不可以龜策求不可以筌蹄得及其譽聞

曲阜南宮展師賓之敬應務中都西鄰化諸侯
之法冬官敘職五土得其攸宜秋令克宣兩觀
展其刑政溝疏墓道但抑季桓田歸汶陽遂陵
齊景尊君卑臣之訓自家刑國之術每惆悵於
興周亦畱連於韶管然而高旻不惠彼日寢微
起哀怨於王風絕歸飛於鳴鳥是邦可化斯道
欲行暖席興憂問津匪倦俎豆嘗說空及三軍
之容季孟有言不接雙鷄之膳晏平推士尚或

相排子西讓王終成見拒亦有宋朝司馬喬木
難休衛國匡人逆旅焚次荷蕢微者翻嗟擊磬
之心儀封細人潛明木鐸之意既而在斯興感
用輟棲遲狂簡斐然彌嗟穿鑿旋驂舊館掃筵
闕里杏壇居寂緇林地幽知十稽微得二承妙
科斗所載方閱舊文睢鳩在篇徧詳雅什河漢
靴鼓鏗鏘之響復傳宗廟衣裳升降之儀還序
博約無倦誘喻多方后稷躬耕近關勵物伯夷

餒死猶可激貪周公其人則神交於夢想管仲
小器歎微之於征伐信立德立言太上謂之不
朽曰仁與義前哲以之周旋覆簣爲山喻天階
而不陟讀易無過假日蝕以鳴謙茨嶺峒山寄
言於獨善歧情風御未涉於通莊妙臻數極作
倅易簡是知縫掖乃兼濟之途華袞非為政之
要及其愚智齊泯椿菌如一南楚狂狷舊辨鳳
哀東魯陪臣奄成麟斃晨興負杖知命發於話

言夕寐奠楹將姜傷其溘慮崇山化谷小天下
而無由殞石沉星架大梁而何有門人議服俱
纏至極之哀國史制詞永錫慙遺之誄及挺深
夏屋樹列遠方五勝迭遷六籍無准席間初聞
已舛微言入室且分過乖大義秦人蛙沸遺燼
翳然漢代龍驤挾書未剪元封有述殘缺載陳
甘露嗣蹤搜揚復起春陵受命先訪於膠庠譙
郡膺符多招於文學逮江馬南渡泉戴北飛鶚

入環林鯨衝聖海有隋交喪中原剪覆東序南
雍鞠爲茂草六樂五禮皆從燬室欽若皇唐肇
膺明命祖武宗文之業天成地平之勲圖書因
樂推重干戈由亂集寧剗舟創浮芹藻之詩先
逮戎衣初捲羽籥之節旋興皇上以聖敬而撫
璇圖文明而膺寶厯夏啓挹其光兆姬誦讓其
惟清化入龍沙風移鯉海金丘展賁瓊田薦賕
潛馬飾黃芝之封浮龜吐綠文之籀虞庠殷塾

廣賓龐叟蓬嶺石渠朋延敦誨垂衣裳而凝思
虛旒續以永懷至於大道寢微流風遂往羸譏
紫色膠踐云阿劉風白金徒遵高里黃初正始
時多間然建武永平業非盡善而迺作樂崇德
殷薦之禮畢陳有字載顒觀下之訓齊設肆類
羣望孝享之義益隆歸功三后尊祖之誠愈切
詔寰中而徵萬玉譯荒外以召百靈一茅分茹
雙鶴共羽翠華遠昇結席虛位上帝儲祉泰壹

有暉山祇傳聲海神會氣九皇之況榮可嗣三
代之闕典還屬迺使朱鳥詳日蒼威戒路七萃
騰景八鸞鏘風過大庭以省方掩洙上而觀藝
晏居莫辨祠堂歸然見馬鬣於荒墳識櫟檀於
古隧歎重泉之可作聞盛德而必祀言敷訓典
廣命杙材贈以泰師式旌幽壤改制神宇是光
令德於時皇唐之御天下四十有九載即乾封
之元年也攝提處歲勾芒獻節兗州都督霍王

元軌大啓籥維肅承綸誥庀徒揆日疏閑難遠
接泮林之舊墻削靈光之前殿徂徠新甫伐喬
木而韻流嚶岱畎泗濱採怪石而喧浮磬頽紫
施絢黝黛飛文沓拱重櫺春憲秋幌陰欄積霧
複閣懷烟几仍度室席遵函丈壽宮澹然眸容
有穆至如襄城有訪七聖接其駢駢汾水言遊
四子冥其衡輒將謂布衣黃屋名器則殊卷領
素王感召宜一顏子侍側似發農山之談季路

承聞如興浮海之說西華束帶尚以要賓言偃
裼裘猶爲得禮避席延其不敏捨瑟睠其幽情
共列昇堂齊參睹興歲時蘋藻復雜菖蒲平日
絃歌還聞絲竹皇儲一德聿隆三善博望邀裾
肅成講義發揮鎔造照贊事業而以周穆之觴
王母尚勤西奔漢帝之展稷丘因書東嶽遂迺
思建隆碣上聞天庥言由國本理會冲情副震
宮之德聲命芸閣以紬頌元堂闢兮神靈優揚

教思兮兩儀配煥皇綱兮融帝載堯可履兮舜
爲佩畫而明兮夜而晦吁嗟業兮麗萬代其辭
曰赫赫上帝悠悠天造神集鴻名聖居大寶循
性稱教率性爲道政若鎔金化倖偃草文畫先
起律呂創陳禮節天地樂和人神成期用簡業
尚日新繹無聲臭隲有彝倫水火朝變憲章時
革周廟傷禾殷墟悲麥褒艷紕雅羸荷淪賸散
亂紀言支離方冊自天生德由縱成能賓筵恪

嗣銘鼎家承蹲龍運并振鐸冥膺闕典攸緝斯
文載興廣訓三千徧于七十厯階東會藏書西
入楚將分社齊聞與邑接輿自狂長沮空執在
智伊妙惟神乃幾羊因魯觸鳥向陳飛翮傳頌
管編照書韋卜商承絢顏子參微堯則不追昌
亦遂往名教潛發心靈泛獎德配乾坤業暉辰
象麟悴遙泣山隤賈仰三統昌日千齡聖期禮
宗有昊展禮崇基覲宣時邁神緘孝思絳螭承

輓翠鳳翻旗上浮龜蒙遥集鄒魯翹勤真蹟惆
悵今古舊壁迷字荒墳翳斧綸賁宗師詔緝靈
宇虹梁野構翬翼林舒雕櫳繡桷圓井方疏沂
童浴早泮鳥鳴初俎豆蠲潔丹青藹如墨檢前
蹤莊放遺轍於昭遐訓允歸聖烈肅穆仁祠陰
沉象設隨四序以潛運懸三光而不跌祕書少
監通事舍人內供奉臣崔行功奉勅撰文奉勅
直祕書行祕書省書學博士臣孫師範書 金

學士党懷英修廟碑記畧云廟有層閣以備度
書願得賜名揭諸其上以觀示四方詔以奎文
名之而命臣懷英記其事 明大學士李東陽

重構奎文閣賦曰闕里宣聖廟舊有奎文閣以
貯古今圖籍在大成殿之前杏壇之南金章宗
重建規制頗精國朝置衍聖公府其屬有奎文
閣典籍一人凡朝廷有事於廟則禮迓香帛度
於閣中以俟行事弘治己未廟災而閣存工既

就緒殿廡闕麗皆加於舊按察僉事黃君繡謂
閣獨弗稱欲撤而新之衆議譁然以爲故物不
可廢黃執之益力巡撫都御史徐公源實主之
閣成高八丈有奇畧與殿等棟宇相埒金碧交
映向之譁者始翕然歸之稱全功焉東陽奉勅
祭告乃登於茲閣欲賦其事未暇也徐公既購
書數百卷付衍聖公聞韶令典籍孫世忠守之
四方藩郡聞而致者日益富徐公使告於予曰

閣不可負也乃爲之賦令刻石立於閣中辭曰
偉新廟兮既宮突高閣兮麗空海之右兮山之
東極灝溔兮爭寵從納沆瀣兮超鴻濛表日觀
兮來天風忽秋令兮始肅見奎星兮正中初徙
倚兮攔前暫徘徊兮戶外殿庭兮巍峩與茲閣
兮相對亭碑矗兮林立壇屋隱兮如蓋昔金元
兮始構幾歲序兮更代歎軒楹兮未燼紛瓦礫
兮浮蓋及輪奐兮鼎成藹冠裳兮咸萃覽舊蹟

兮無餘撫孤根兮一檜吁嗟乎靡麗兮娉婷彼
齊雲兮落星悵望兮怔營或籌邊兮見京夫豈
若覩羹牆兮故宅誦典則兮遺經宛蚪蚪兮孔
壁恍金絲兮魯聲感春秋兮絕筆憶詩禮兮趨
庭存奇文兮籀史脫虐燄兮秦坑藉神鬼兮呵
護閼山川兮精英乃有韋編兮竹簡石墨兮溪
藤汗牛充棟兮不可以數計又奚問乎何名幽
并兮青兗渺宮牆兮在眼景行兮高山每爲憾

兮不淺金書兮玉節幸吾生兮未晚遡秋霄兮
愈次恨夏日兮猶短仰聖道兮彌高思古風兮
漸遠閱千載兮一時曾一慨兮不滿睽逸駕兮
可攀尚顏波兮在挽噫噓噓靈有地兮傑有人
賢有象兮國有賓下有土兮上高旻軼倒景兮
離塵氛博典冊兮窮皇墳厲夕惕兮求朝聞豈
徒析蟲魚兮隱義辨豕亥兮疑真訝雨粟兮天
半降青藜兮夜分蓋方舞干羽兮七旬徧絃歌

兮八垠占聚緯兮周髀聽圜橋兮成均殆將興
兮吾道庶不朽兮斯文巍乎高哉勢不可以極
茲閣之名兮竝列宿而俱存

臣按明洪武間祕書監發下奎文閣書籍經止
於易書詩春秋禮記周禮史則資治通鑑及元
史古文左傳而外惟韓柳文視宋金元所頒九
經三史爲少其時庶事草創書版未行中書省
咨送內開元史一部別科印造未完候裝潢完

備另行發付可知也以後奎文閣重建正德十五年山東巡按御史熊相巡撫都御史王珣相與謀廣其藏與提學副使江潮等醵金購書以實閣記云凡若干金市之於四方以庚辰九月至又云經書與諸子百家稗官爾雅皆備惜二百年以來篇章殘缺而其籍不存又按御製書惟宋有賜太宗御製御書共五百十七軸仁宗累賜三聖御書然孝經而外多唄誦之言及法

帖飛白詩卷碁譜之類卷帙已湮徒其目在耳
至我

皇上亶聰迪哲體道性成而撰述弘博仰見
宸翰之所臨摹與

內府之所刊刻皆經史之要傳心之錄篇帙浩瀚富
有日新今四子五經

日講諸書既宣

賜廟庭

聖製降於纂修之館

御書奉於

宸翰之樓題額廟碑卷軸輝麗尚冀金匱石室之藏蘭臺西清之本頒降自

天流光億禩不敢冒昧實所仰望云爾

上由奎文閣西偏門出閱永樂弘治碑前至同文門

同文

門在奎文閣前由櫺星門入第三門也

觀門右漢碑孔尚任奏曰

此漢元嘉三年魯相乙瑛始置卒史碑今謂之

百戶碑

上問何爲百戶碑尚任奏曰歷代優崇之典於廟庭設
官四員典籍以教習禮儀司樂以典司樂舞管
勾以經理屯田百戶以守衛林廟謂之禮樂兵
農四司衍聖公孔毓圻奏曰今典籍司樂管勾
皆奉

朝選惟百戶止由臣剏委於典制未全伏望

皇上特恩一體選設

上命毓圻具疏上請是月

詔復設

聖廟百戶與典籍管勾司樂一體咨部

題授

吏部

題爲欽奉

上諭事據衍聖公孔毓圻奏稱孔廟設立百戶一員掌管祭器及灑掃守衛典籍一員掌管書籍及禮

生司樂一員掌管碑刻及樂舞生管勾一員掌管祭田及祭品謂之禮樂兵農四科至故明洪武年間典籍司樂管勾俱由部選其俸祿在衍聖公祭田支給而百戶止由衍聖公委用竝未達部至今相沿禮樂兵農未全誠爲缺典今現有供事之人但求職名達部而祀典有光矣
奉

上諭交與吏部議奏欽此欽遵該_臣等會議得查吏部

定例內衍聖公所屬應補官員照咨補授今衍
聖公既稱百戶姓名達部而祀典有光等語應
將現在供事百戶姓名咨送兵部註冊所給俸
祿照別官員於祭田內支給可也奉

旨依議

兵部咨為欽奉

上諭事職方清吏司案呈奉本部送准衍聖公咨開將
現在供事百戶陳治世姓名咨請具

題給劉前來查孔廟百戶先經吏部會同本部覆准
將現在供事百戶姓名咨部註冊在案今衍聖
公既將現在供事百戶陳治世姓名咨部無庸
具題相應將百戶陳治世註冊給與劉付可也
附錄 漢魯相置孔子廟百石卒史碑其文曰
司徒臣雄司空臣戒稽首言魯前相瑛書言詔
書崇聖道勉六藝孔子作春秋制孝經刪述五
經演易繫辭經緯天地幽贊神明故特立廟褒

成侯四時來祠事已即去廟有禮器無常人掌
領請置百石卒史一人典主守廟春秋饗禮財
出王家錢給大酒直須報謹問太常祠曹掾馮
牟史郭元辭對故事辟雍禮未行祠先聖師侍
祠者孔子子孫太宰太祝令各一人皆備爵太
常丞監祠河南尹給牛羊豕雞缺二各一大司
農給米祠臣愚以爲如瑛言孔子大聖則象乾
坤爲漢制作先世所尊祠用衆牲長史備爵今

欲加寵子孫敬恭明祀傳于罔極可許臣請魯
相爲孔子廟置百石卒史一人掌領禮器出王
家錢給大酒直他如故事臣雄臣戒愚戇誠惶
誠恐頓首頓首死罪死罪臣稽首以聞制曰可

元嘉三年三月廿七日壬寅奏雒陽宮元嘉
三年三月丙子朔廿七日壬寅司徒雄司空戒
下魯相承書從事下當用者選其年卅

古四十字已

上經通一藝雜試通利能奉弘先聖之禮爲宗

所歸者如詔書書到言 永興元年六月甲辰

朔十八日辛酉魯相平行長史事卞守長

缺一字

叩頭死罪敢言之司徒司空府壬寅詔書爲孔

子廟置百石卒史一人掌主禮器選年卅以上

經通一藝雜試通利能奉弘先聖之禮爲宗所

歸者平叩頭叩頭死罪死罪謹按文書守文學

掾魯孔龢師孔憲戶曹史孔覽等雜試龢修春

秋嚴氏經通高第事親至孝能奉先聖之禮爲

宗所歸除餼補名狀如牒平惶恐叩頭死罪死
罪上司空府讚曰巍巍大聖赫赫彌章相乙瑛

字少卿平原高唐人令鮑疊

古疊字

宇文公上黨

屯畱人政教稽古若重規矩乙君察舉守宅除
吏孔子十九世孫麟廉請置百石卒史一人鮑
君造作百石吏舍功垂無窮於是始孔門僉
載云按此文蓋魯相乙瑛上書請置卒史一人
典主守廟司徒吳雄司空趙戒以聞制從之乃

在元嘉三年三月後魯相平補以孔和上書於
司空府則永興元年六月也考之范史桓帝紀
元嘉惟有二年碑云元嘉三年三月者蓋是年
五月始改永興至十月而雄戒亦罷免矣初
公府止設掌書一人書籍音樂無專司元仁宗
延祐間孔思晦請用辟雍故事置管勾典籍司
樂三人分掌之中書集賢吏禮部胄監往復諮
問數年始得置設元仁宗延祐七年六月十

八日中書禮部准戶部關承中書省判送戶部
呈准吏禮部關襲封衍聖公申照得至大四年
省部降到廟庭登歌樂及獻官法服並執事樂
藝人等禮服緣爲本廟別無設立樂師就選到
國子陪堂生員白惟潛充樂師本部議得合依
國子學例設司樂一員教習生員以備春秋祭
祀令司樂白惟潛於延祐六年八月十三日公
參勾當外本人合得俸給比依國子監司樂俸

例給降相應奉都堂鈞旨付蒙古筆且齋房依
例出給劄付議得先聖祖廟既已降登歌雅樂
依准所擬設立司樂一員比依國子監司樂出
身又議得先聖祖廟司樂白惟潛雖是劄設緣
係教習生徒春秋祭祀人員吏部照勘參詳所
索俸給依所指國子監司樂月支俸至元鈔一
十六兩六錢六分自呈准月日爲始令濟寧路
支付覆奉都堂鈞旨依例施行除已行下濟寧

路依上施行合下照驗下襲封衍聖公府劄到
奉行 至大二年三月中書禮部承奉中書省
劄付本部呈襲封衍聖公申朝廷降到書籍數
多缺人掌管選到本學生員任性善權行掌管
如蒙照依國子學例就將見管生員任性善設
充典籍通行掌管送據吏部呈參詳如准禮部
所擬相應覆奉都堂鈞旨連送吏部依上施行
奉此本部議得襲封衍聖公申保生員任性善

充廟學典籍既已依准勾當本人例受都省劄
付給降相應具呈照詳得此除外合下都省仰
照驗依上施行 元歐陽玄林廟初設管勾序
曰邇余讀魯相置孔子廟卒史碑載司徒臣雄
司空臣戒言魯相瑛書稱孔子廟褒成侯四時
來祠事已即去廟有禮器無常人掌領請置百
石卒史一人典守之此元嘉中事也余頃代國
子博士中春秋祀上丁中書奉上帝代祀御史

二人糾儀物禮部主符戶部器皿兵部車駕工
部帝幄光祿醴齊宣徽免鹿脯脩畱守燎烜薌
宗正卒徒大興尹築盛犧牲事視古加詳禮器
則常置管勾一人司其事實與百石卒史同方
是時衍聖公言曲阜祠事倣辟雍獨器服無常
職請用辟雍故事置管勾中書集賢吏禮部胄
監往復咨問數年始決於是朝士大夫會辭薦
蜀士簡君當其選簡名實理又詩歌以送之

明洪武七年二月二十二日禮部尚書給事御史等官於奉天門東板房奏衍聖公合設官屬孔顏孟三氏子孫教授一員學錄一員屬官管勾一員典籍一員司樂一員又掌書一名書寫一名秦差一名知印一名學司一名尼山洙泗二處各設教諭一員奉旨慫寫出漢唐宋待孔氏子孫典故將來我就定奪將去本月二十四日各官於武英殿將漢唐宋待孔氏子孫典故

進奏議得衍聖公府屬內掌書一名前元照依
六部令史月給祿米二石俸鈔一百二十五兩
典史知印奏差共三名俱係創設屬官典籍管
勾司樂三員各給月米一石俸鈔八十兩元設
孔顏孟三氏子孫教授學錄並洙泗尼山書院
設立教諭等四員上項教官止於贍學田內所
收籽粒養贍奉旨孔顏孟三氏教授其餘所屬
官吏著衍聖公孔希學保舉來准用月俸就於

免粮田内自行量撥

臣按卒史碑宋張稚圭據圖經定爲魏鍾繇書

隸釋考鍾繇之卒去永興七十八年圖經非也

碑中間行布空處有文二行云司徒公河南一缺

字季高司空公蜀郡成都字缺一字意伯其缺

文皆當是人字也稚圭云雄與戒俱未載姓考

之漢書雄乃吳雄戒乃趙戒趙明誠金石錄云

按華陽國志後漢書注皆言趙戒字志伯而此

碑乃作意伯疑其避桓帝諱故改焉今按碑文
是前相瑛實始其事既得請而去官後相平乃
牒補孔鮒是相平亦有功於聖門者而不與乙
君並列於後遂逸其姓亦不知其何處人爲可
惜也

臣又按元嘉始置百石卒史其職掌領禮器黃
初之詔則云令魯郡修起舊廟置百石卒史以
守衛之蓋以漢之制祿秩自二千石至百石百

石以下爲斗食碑文是百石非百戶而其職則
今之百戶職也歷代復民供灑掃守衛率百戶
有差卒史初置選於孔氏子弟其後選於諸儒
生弘治十一年准於灑掃戶才德兼優者委用
其職掌專司林廟戶籍訓以武事守衛林廟司
掃除啓閉收掌禮器凡祭祀則造酒飼牲燎烜
滌濯陳設省眎至期充監宰官瘞埋毛血其服
如各衛所百戶其祿與管勾同在免糧田內支

給蓋本於漢魏之百石卒史以其管灑掃百戶
之人故亦謂之百戶云我

皇上考古驗今隸其籍於司馬重其職於

朝選責以游徼干掇之任禮樂兵農爛然並例而祠
官無不備之物所以尊我夫子者百代莫與京
也已

幸魯盛典卷八

欽定四庫全書

史部

幸魯盛典卷九至十二

詳校官宗人府府丞臣寶光鼎

編修臣程嘉謨覆勘

總校官進士臣繆珙

校對官助教臣胡予襄

謄錄監生臣張曾詣

謄錄舉人臣李椿

欽定四庫全書

幸魯盛典卷九

上以次觀漢永壽二年韓勅造禮器碑漢永興二年諸郡史孔謙碑魏黃初元年宗聖侯孔羨碑

附錄 漢永壽二年魯相韓勅造立禮器碑其

文曰維永壽二年青龍在涖灘碑作敦古字借用霜月

之靈皇極之日魯相河南京韓君追惟太古華

胥生皇缺顏育缺實俱制元道百王

不改孔子近聖爲漢定道自天王以下至於初

學莫不駢

疑古
慨字

思嘆仰師鏡顏氏聖舅家居魯

親里亓官聖妃在安樂里聖族之親禮所宜異

復顏氏亓官氏邑中繇發以尊孔心念聖厯世

禮樂陵遲秦項作亂不尊圖書倍道畔德離敗

聖輿食糧亡於沙丘君於是造立禮器樂之音

符鐘磬瑟鼓壘

碑作雷古
字省文

洗觴觚爵鹿俎豆籩

枹

音凡

禁壺脩飾宅廟更作二輿朝車威熹宣抒

元汙以注水流法舊不煩備而不奢上合紫臺

稽之中和下合聖制事得禮儀於是四方士人

碑作仁古
與人通聞君風耀敬咏其德尊琦大人之意

卓彌之思乃共立表石紀傳億載其文曰皇戲

古與義
字通統華胥承天畫卦顏育空桑孔制元孝

俱祖紫宮太一所授前閭古開
字九頭以升言教

後制百王獲麟來吐制不空作承天之語乾元

以來三九之載八皇三代至孔乃備聖人不世

期五百載三陽吐圖二陰出讖制作之義以俟
知興於穆韓君獨見天意復聖之族卓越紀思
脩造禮樂胡輦器用存古舊宇慤慤宅廟朝車
威熹出城造作漆不水解工不爭賈深除元汙
水通流注禮器升堂天雨降澍百姓訢和舉國
蒙慶神靈祐誠竭敬之報天與厥福永享年壽
上極華祀旁脩碑作攸古
字省文皇代刊石表銘與乾
輝耀長期蕩蕩於盛復授赫赫罔窮聲世億載

臣按永壽桓帝紀年也桓帝永興三年正月戊申改元永壽明年丙申曰歲在涪灘也霜月之靈皇極之日歐陽修云疑是九月五日也碑正面及碑陰俱列姓名出錢若干韓明府名勅字叔節勅音賚與勞徠之徠同答勤曰勞撫至曰勅示有節也故字叔節

魏立孔子二十一世孫羨爲宗聖侯碑其文曰維黃初元年大魏受命肩軒轅之高蹤紹虞氏

之遐統應歷數以改物揚仁風以作教於是揖

讀輯五瑞班宗彝鈞衡石同度量秩羣祀於無文

順天時以布化既乃緝熙聖緒昭顯上世追存

二代三恪之禮兼紹宣尼褒成之後以魯縣百

戶命孔子廿一世孫議郎孔羨爲宗聖侯以奉

孔子之祀制詔三公曰昔仲尼負大聖之才懷

帝王之器當衰周之末而無受命之運

缺二字

魯衛之朝教化乎洙泗之上栖栖焉皇皇焉欲

屈已以存道貶身以救世於是王公終莫能用
乃退考五代之禮脩素王之事因魯史而制春
秋就太師而正雅頌俾千載之後莫不采其文
以述作仰其聖以成謀咨可謂命世大聖億載
之師表者已遭天下大亂百祀墮壞舊居之廟
毀而不脩褒成之後絕而莫繼闕里不聞誦
之聲四時不睹烝嘗之位斯豈所謂崇化報功
盛德百世必祀者哉嗟乎朕甚閔焉其以議郎

孔美爲宗聖侯邑百戶奉孔子之祀令魯郡脩
起舊廟置百石吏卒以守衛之又於其外廣爲
屋宇以居學者於是魯之父老諸生遊士睹廟
堂之始復觀俎豆之初設嘉聖靈於髣髴想貞
祥之來集乃慨然而嘆曰大道衰廢禮學滅絕
卅餘年皇上懷仁聖之懿德兼二儀之化育廣
大苞於無方淵深淪於不測故自受命以來天
人咸和神氣烟燭嘉瑞踵武休徵屢臻殊俗解

編髮而慕義遐方越險阻而來賓雖太皞遊龍
以君世虞氏儀鳳以臨民伯禹命元宮而爲夏
后西伯由岐社而爲周文尚何足稱於大魏哉
若乃紹繼微絕興脩廢官疇咨稽古崇配乾坤
況神明之所福祚宇內之所歡欣豈徒魯邦而
已哉爾乃感殷人路寢之義嘉先民泮宮之事
以爲高宗僖公蓋嗣世之王諸侯之國耳猶著
德於三頌騰聲於千載況今聖皇肇造區夏創

業垂統受命之日曾未下輿而褒美大聖隆化
如此能無頌乎乃作頌曰煌煌大魏受命溥將
繼體黃虞含夏苞商降釐下土上清三光羣祀
咸秩靡事不綱嘉彼元聖有邈其靈遭世霧亂
莫顯其榮褒成既絕寢廟斯傾闕里蕭條靡歆
靡馨我皇悼之尋其世武乃建宗聖以紹厥後
脩復舊堂豐其薨宇莘莘學徒爰居爰處王教
既新羣小遄沮魯道以興永作憲矩洪聲登假

神祇來和休徵雜還瑞我邦家內光區域外被
荒遐殊方慕義搏拊揚歌於赫四聖運世應期
仲尼既沒文亦在茲彬彬我后越而五之垂於
億載如山之基

臣按此碑張稚圭以為曹植撰詞梁鵠書鍾繇
刻

又於門左觀漢建寧二年史晨祀廟碑漢永壽
三年韓勅脩墓碑及漢泰山都尉孔宙博陵太

守孔彪墓碑

附錄 魯相史晨奏出王家穀祀孔子廟碑其
文曰建寧二年三月癸卯朔七日己酉魯相臣
晨長史臣謙頓首死罪上尚書臣晨頓首頓首
死罪死罪臣蒙厚恩受任符守得在奎婁周孔
舊寓不能闢弘德政恢崇壹變夙夜憂怖累息
屏營臣晨頓首頓首死罪死罪臣以建寧元年
到官行秋饗飲酒泮

碑作泮
古字通

宮

缺

復禮孔

子宅拜謁神坐仰瞻棟桷俯視几筵靈所馮依
肅肅猶存而無公出酒脯之祠臣即自以俸錢
脩上案食醑具以叙小節不敢空謁臣伏念孔
子乾坤所挺西狩獲麟爲漢制作故孝經援神
契曰元邱制命帝外行又尚書考靈耀曰邱生
蒼際觸期稽度爲赤制故作春秋以明文命綴
記撰書脩定禮義臣以爲素王稽古德亞皇代
雖有褒成世享之封四時來祭畢即歸國臣伏

見臨辟雍日祀孔子以太牢長吏備爵所以尊
先師重教化也夫封土爲社立稷而祀皆爲百
姓興利除害以祈豐穰月令祀百辟卿士有益
於民矧乃孔子元德煥炳光於上下而本國舊
居復禮之日闕而不祀誠朝廷聖恩所宜特加
臣寢息耿耿情所思維臣輒依社稷出王家穀
春秋行禮以共禮祀餘昨賜先生執事臣晨頓
首頓首死罪死罪臣盡力思惟庶政報稱爲效

增異輒上臣晨誠惶誠恐頓首頓首死罪死罪

上尚書 時副言太傅太尉司徒司空大司農

府治所部從事 昔在仲尼汁光

黑帝曰汁光紀

之精

大帝所挺顏母毓靈承敝遭衰黑不代蒼轍環

應聘嘆鳳不臻自衛反魯養徒三千獲麟趣作

端門見徵血書著紀黃玉韻

音響

應主爲漢制道

審可行乃作春秋復演孝經刪定六藝象與天

談鈞河摘雒却揆未然魏魏蕩蕩與乾比宗

其碑陰云相河南史君諱晨字伯時從越騎校尉拜建寧元年四月十一日戊子到官乃以令日拜謁孔子望見闕觀式路虔跪既至升堂屏氣拜手祇肅屑僂髣髴若在依舊宅神之所安春秋復禮稽度元靈而無公出享獻之薦欽因春饗導物嘉會述脩辟雍社稷品制即上尚書參以符驗乃敢承祀餘胙賦賜刊石勒銘并刻本奏大漢延期彌歷億萬時長史廬江舒

李謙敬讓五官掾魯孔暢功曹史孔淮戶曹掾
薛東門榮史文陽馬琮守廟百石孔讚副掾孔
綱故尚書孔立元世河東太守孔彪元上處士

孔哀文禮皆會廟堂國縣員

缺一字

吏無大小空

府竭寺咸俾來觀并泮宮文學先生執事諸弟
子合九百人雅歌吹笙考之六律八音克諧
蕩邪反正奉爵稱壽相樂終日於穆肅雖上下
蒙福長享利貞與天無極 史君饗後部史仇

誦縣吏劉耽等補完里中道之周左牆垣壞決

作屋塗色脩通大溝西流

缺一字

里外南注城池

恐縣吏斂民侵擾百姓自以城池道濡

古孺字

麥

給令還所斂民錢材

古財字通用

史君念孔漬顏

母井去市遼遠百姓酤買不能得香酒美肉於

昌平亭下立會市因彼左右咸所願樂又勅

漬井復民飭治桐車馬於漬上東行道表南

北各種一行梓假夫子冢顏母井舍及魯公

冢守吏凡四人月與佐除

臣按漢元嘉永壽建寧及魏黃初碑各缺數字
餘皆完好可讀至永壽三年脩墓碑乃魯相韓
勅脩孔子墓碑也碑陰載輸錢人名及孔子冢
下復民吳仲初等十餘人字差可辨歐陽脩錄
林廟漢碑皆有跋尾此碑獨無則在宋時已無
完本其碑在墓前久仆地今移置同文門又漢
泰山都尉孔宙碑文云宙字季將孔子十九世

孫北海相融之父漢博陵太守孔彪碑文云彪
字元上孔子十九世孫潁川君之元子蓋魯相
晨碑所云河東太守孔彪元上者也與漢諸郡
史孔謙碑皆自林中移至同文門宙碑點畫完
者尚多彪謙二碑剝落不可次第

上閱碑竟問門外尚有古蹟否孔尚任奏曰前仰高門
有壁水一曲無源易涸若導城東文獻泉西北
入城以注之斯壁水常盈藻芹有託但未奉

明旨不敢疏鑿

上曰此有何妨顧大學士王熙曰衍聖公孔毓圻等所奏曲阜城外泉水既不關係運河著准其開通入城交與該撫遵行

駕自同文門回閱洪武永樂碑復由奎文閣東偏門入觀宋金元脩廟碑行數武

問廟基廣濶何處是先師故宅衍聖公孔毓圻奏曰皇上所御講筵之後有魯壁遺址乃先師燕居之所復

入承聖門觀堂前太初石唐槐及銀杏樹由中階升詩禮堂衍聖公孔毓圻奏曰此當日夫子獨立伯魚趨庭得聞詩禮之處

附錄 詩禮堂初名壽堂藏夫子衣冠車服禮器諸儒講禮飲射於中舊制甚狹宋真宗幸闕里改建駐蹕便殿帝還次兗州有司奏令撤毀命去鴟吻爲孔氏延賓齋於東偏別設屋以藏禮器 李東陽詩禮堂銘云闕里孔廟之東有

詩禮堂蓋舊名也嘗聞故衍聖公弘泰言金章
宗謁廟時爲行幄以駐蹕比去有司請撤之章
宗云留孔氏爲延賓齋遂止勿撤近毀於火今
稍移而東南數武許加崇廣焉因爲銘以遺今
衍聖公聞韶俾識之銘曰惟孔有庭聖訓攸在
父立子過其徒是賴其訓維何維詩及禮手所
刪定教自家始聖不可作庭名固存萬世是師
矧惟子孫有齋延賓金所駐蹕新廟既闢新堂

亦遷有來繩繩世守勿愆 太初石在詩禮堂
前高丈餘唐槐在其傍又銀杏一株亦千餘年
樹也

臣按詩禮堂藏車服禮器祥符明昌皆於此駐
蹕恭逢我

皇上臨幸設

黃幄

御講筵端拱穆若威顏下霽論說從容觀聽竦肅

皇上周視廟庭凡三履其地徘徊慨慕有無窮之思而
臚唱班聯之盛都俞拜颺之隆皆在此堂千載
而下聞風贊嘆況生逢其會者乎今恭懸

聖諭於上而奉萬世師表碑石立於中

聖謨

祖訓咸式臨焉登茲堂者益肅然起敬而仰頌

聖澤之宏深無盡矣

上於堂後觀孔宅遺井憑欄歎羨衍聖公孔毓圻奏曰

此臣祖當年所飲之井也

上命汲水嘗之

附錄 夫子舊宅在大成殿之東偏宅大一頃
今毓粹門外南向小門夫子舊宅門也井在詩
禮堂後明兗州府知府童旭護以石欄

上問魯壁遺址孔毓圻奏曰昔秦始皇焚詩書

臣九世

祖孔鮒預藏尚書論語孝經諸書於壁中至漢
魯恭王欲毀臣祖故宅以廣其宮聞壁中有金

石絲竹之聲發之得竹簡古文故後世名其堂

曰金絲

附錄

明李東陽金絲堂銘曰金絲堂舊在孔

廟左廡之東東直井前直詩禮堂嘗掘地得石刻知爲孔子故宅蓋世所傳魯恭王聞金石絲竹之聲者也故歷代之樂器藏於其間比者廟燬而堂猶存新廟之闢堂地皆入左廡金絲則移而西與詩禮堂正相直東陽既爲篆額復爲

銘金絲之銘曰惟孔有宅曰惟聖門魯恭何人
欲壞更存維壁有書四代之文維堂有聲八音
是聞此事茫昧書則真有有堂載新宅固其舊
聞樂知德斯言已久金絲在焉名不可朽昔堂
在東今堂在西欲究厥初觀我銘詩

上顧衍聖公孔毓圻曰爾家古蹟看完未毓圻等奏曰
先聖遺蹟湮沒已多不足當

皇上御覽但經

聖恩一顧從此

祖廟增輝書之史冊傳之萬世仰頌

皇上尊師重道匪直臣一家之榮幸大學士王熙翰林

院學士孫在豐侍講學士高士奇咸跪奏曰鈺

圻言是

上微笑頷之又登詩禮堂升

御幄衍聖公孔毓圻等出候承聖門外

上取

聖製過闕里詩

命大學士王熙捧出

賜衍聖公孔毓圻毓圻等跪接展讀

詩載第一卷

讀畢

咸叩頭謝

恩奏曰從古帝王過闕里惟唐明皇有詩一章不過感慨嗟歎之言並無尊崇聖學之意伏覩

御製新詩超今軼古景仰聖道不啻羹牆

臣

家何幸膺

茲

寵錫

臣

謹奉爲子孫世世永寶羣臣咸曰

天章睿藻雲漢昭回洵非開元一詩所可幾及也

附錄

唐明皇過魯祭孔子廟而歎之詩云夫

子何爲者栖栖一代中地猶鄒氏邑宅即魯王
宮歎鳳嗟身否傷麟怨道窮今看兩楹奠當與
夢時同

張說應制奉和詩曰孔聖家鄒魯儒

風藹典墳龍驂過舊宅鳳德詠餘芬入室神如
在升堂樂自聞懸知一王法今日待明君張九

齡應制詩曰孔門泰山下不見登封時徒有先
王法今爲明主思恩加萬乘幸禮致一牢祠舊

宅千年外光華今在茲

以下并附歷代孔氏
世裔承恩奏對事畧

漢孔安國明達淵博雅學絕倫少學詩於申公
受尚書於伏生長則博覽經傳問無常師年四
十爲諫議大夫雖與羣臣並參侍武帝爲侍中
見待崇禮遷博士後魯恭王壞孔子故宅於壁
中得古文虞夏商周之書及傳論語孝經乃不

壞宅悉以書還孔氏安國承詔作書傳又著古文孝經論語訓解孔霸治尚書漢昭帝時爲博士宣帝時爲大中大夫以選授皇太子經遷詹事爲高密相元帝即位徵拜太師賜爵關內侯食邑八百戶號褒成君賜黃金二百斤第宅一區徙名數於長安霸上書求奉先聖祠詔令以所食邑祀孔子故霸子福名數於魯奉孔子祀孔光霸少子漢成帝時爲光祿勳領尚書

凡典樞機十餘年守法度脩故事上有所問據
經法以心所安而對時有所言輒削藁以爲章
主之過以干忠直人臣大罪也有所薦舉惟恐
其人知之沐日歸休兄弟妻子燕語終不及朝
省政事或問光溫室省中樹皆何木也光默不
應更答以他語平帝年少太后稱制徙爲太師
稱疾辭位太后詔曰太師光聖人之後先師之
子德行純淑道術通明居四輔職輔帝於道今

年耆有疾其令太師母朝十日一賜餐賜太師
靈壽杖光凡爲御史大夫丞相各再一爲大司
徒太傅太師歷三世居公輔前後十七年孔
僖與崔駰因遊太學習春秋隣房生梁郁陰上
書告駰誹謗先帝刺譏當世事下有司駰詣吏
受訊僖以吏捕方至恐誅乃上書自訟詣闕待
罪詔勿問拜僖蘭臺令史元和二年春帝東巡
狩還過魯幸闕里僖因自陳謝帝曰今日之會

寧於卿宗有光榮乎對曰臣聞明王聖主莫不
尊師貴道今陛下親屈萬乘辱於敝里此乃崇
禮先師增輝聖德至於光榮非所敢承帝大笑
曰非聖者子孫焉有斯言遂拜僖郎中詔從還
京師使校書東觀 孔損爲褒成侯漢章帝東
巡狩損助祭 唐孔穎達太宗朝爲文學館學
士封曲阜縣男轉給事中數以忠言進帝問孔
子稱以能問於不能以多問於寡有若無實若

虛何謂也對曰此聖人教人之謙耳已雖能仍
就不能之人以咨所未能已雖多仍就寡少之
人更咨其多內有道外若無中所實容若虛非
特匹夫君德亦然若其據尊極之位銜聰輝明
恃才以肆則上下不通君臣道乖自古滅亡莫
不由此也帝稱善除國子監司業歲餘以太子
右庶子兼司業與諸儒議歷及明堂事多從其
說皇太子令穎達撰孝經章句因文以盡箴諷

帝知數爭太子失賜黃金一斤絹百疋久之拜
祭酒侍講東宮帝幸太學親釋奠命穎達講經
畢上釋奠頌有詔褒美穎達先與顏師古司馬
才諸儒受詔撰定五經義訓凡一百八十卷名
曰五經正義太宗降詔曰卿等博綜古今義理
該洽考前儒之異說符聖人之幽旨實爲不朽
付國子監施行賜穎達物三百段 五代孔仁
玉九歲通春秋爲人嚴整臨事有斷後唐明宗

長興元年爲曲阜主簿三年遷龔邱令龔文宣
公晉高祖天福五年改曲阜令後周太祖廣順
二年幸曲阜拜孔子廟及墓召仁玉賜五品服
復以爲本縣令 宋孔宜舉進士不第乾德中
詣闕上書述其家世詔以爲曲阜主簿歷遷司
農寺丞掌星子鎮市宜上言星子當江湖之會
商賈所業請建爲軍詔以爲縣就命宜知縣事
後以爲南康軍宜代還獻文賦數十篇太宗覽

而嘉之召見問以孔子世嗣謂左右曰家世之
遠有如此者乎因下詔曰素王之道百代所崇
傳祚襲封抑存典制文宣王四十四代孫司農
寺丞宜服勤素業砥礪廉隅承厯官聯洽聞政
績聖人之後世德不衰俾登朝倫以光儒胄可
太子右贊善大夫襲封文宣公復其家太平興
國八年詔脩曲阜孔子廟宜貢方物爲謝詔褒
之宜弟勗進士及第厯官五十年博學能文尤

工於詩任曲阜縣令初真宗東封謁廟求孔氏
子孫令主廟事有司言勗即文宣公宜之弟謹
愿可任詔以殿中丞知仙源縣兼檢校先聖廟
賜緋魚袋後以工部侍郎告老孔延世爲許
州長葛令至道三年真宗諭侍臣令訪先聖子
孫呂端奏有世嫡延世見任長葛令宣赴闕詢
以家門故事授曲阜令襲封文宣公制曰叔教
陰德尚繼絕於楚邦臧孫立言猶有後於魯國

豈聖人之後可獨遠於陵廟許州長葛令孔延
世鍾裔孫之慶仕文理之朝能敦素風甚有政
術宜在桑梓之地以奉烝嘗之儀上親諭之曰
汝宜精心以典祖廟無情面賜白金束帛及太
祖御書并九經書延世子聖祐景德初始九歲
賜同學究出身大中祥符元年東封泰山特賜
聖祐衣綠陪位綴京官班還至兗州幸曲阜擢
爲太常寺奉禮郎後襲封文宣公改名祐又錄

其近屬進士渭同三傳出身習進士延佑習學
究延渥延魯延齡並同學究出身共賜銀一百
兩絹三百疋以充奉祠廟延魯大中祥符五年
復舉進士及第後改名道輔爲御史中丞孔
宗翰知仙源縣爲治有條理王珪司馬光上章
論薦由通判知虔州時章貢兩江歲爲水齧宗
翰伐石爲址治鐵錮之由是屹然詔書褒美哲
宗初立求言吏民上書以百數詔司馬光閱其

可用者十五人獨稱獎其二乃宗翰王鞏也元祐初詔爲司農少卿遷鴻臚卿言孔子之後自漢以來有褒成奉聖宗聖之號皆賜實封或緣帛以奉先祀至於國朝益加崇禮真宗東封臨幸賜子孫世襲公爵然兼領他官不在故鄉於名爲不正請自今襲封之人使終身在鄉里詔從之改衍聖公爲奉聖公不領他職給廟學田萬畝賜國子監書立學官誨其子弟元孔思

晦資質端敏受業於導江張鎮講求義理舉茂
材爲范陽寧陽兩地教諭於是族人議思晦適
長且賢宜襲封爵奉祀事狀上政府未決仁宗
在位雅尚儒道一日問孔子之裔今幾世襲爵
爲誰廷臣具對曰未定帝取孔氏譜牒觀之曰
以嫡襲封者思晦也復奚疑特授中議大夫襲
封衍聖公月俸一百緡加至五百緡賜四品印
泰定三年山東廉訪使王鵬南言襲爵上公而

階止四品弗稱且失尊崇意明年陞嘉議大夫
至順二年改賜三品印 孔克堅至元時授嘉
議大夫襲封衍聖公至正八年朝廷謂公爵與
階不稱制授中奉大夫賜以銀章十五年平章
薦克堅明習禮儀徵爲同知太常禮儀院事攝
太常卿遂拜治書侍御史辭歸拜山東廉訪使
又辭會山東亂北行抵藁城召入爲直賢學士
十九年遷禮部尚書國子祭酒謝病歸有明定

鼎太祖屢詔促入覲待以賓禮而不名賜廩祿
慰勞甚至郊社必致膳肉上嘗謂曰爾有福快
活人也政事不以煩爾 明孔希學朝謁行在
太祖問民利病希學條對有序上甚嘉納賜雜
綵六端命回守祖庭歲入覲始至中使慰勞賜
予稠疊館餽至僕隸累勅禮部用意禮待歲旦
朝賀班亞上相 孔訥丁父憂以馬后喪赴京
祭陵既竣事入覲太祖顧謂廷臣曰孔訥真聖

人子孫也賜膳光祿命館於太學遣尚書劉仲
質勞問日繼庖廩賜衣物鈔錠將使襲封以居
喪辭乃止服除朝京師上喜命禮官擇日授爵
拜命之日大廷百僚班列勅教坊樂送至太學
學官率諸生二千餘人迎於成賢街初行誥詞
吏部請用資善階上曰既爵公勿事散官但誥
以織文玉軸爲異耳遂爲故事孔涇仕元爲
翰林簡閱洪武時以公事至京師上問襲封與

世職相應典故衆皆失常涇獨出班應對敷奏
詳明上喜賜燕及楮幣及回賜藤椅遣吏部尚
書王昂責勅諭之曰到家好生管理族屬務要
遵守祖訓著將這榜令後世子孫以爲故事

孔彥縉其名仁宗爲太子監國時所命也永樂
八年襲封年尚幼成祖觀其言動進退從容喜
謂侍臣曰眞聖人裔也館之太學禮待甚厚洪
熙元年賜第於東安門北景泰二年視學陪祀

賜三臺銀印玉帶織金麒麟服 孔諤永樂六年舉人明年會試副榜第一時太宗行在北京仁宗以太子監國事謂近臣曰我朝孔子子孫未有出仕者今有此一人何不取進士對曰考試至公雖父子不容私吏部欲除諤教官仁宗召見曰孔諤少年偉俊務著中進士命冠帶送國子監肄業未幾左春坊左中允員缺仁宗顧謂東宮官曰春坊中允幾品對曰正六品曰著

孔諤做教皇子諸王賜宅一區及器皿諸物諤
嚴正不阿後轉大理評事改監察御史 孔弘
緒年八歲景帝遣使驛召之陛見之日賜冠服
於東角門俾襲封爵弘緒進止應對如成人帝
見其垂髻命中官即廡下賜膳使歸遺母又賜
玉帶以其軀小去二銖授之又賜金圖書印其
文曰謹禮崇德念弘緒穉幼勅戒族人共保護
之如有恃强挾長以陵害者許具實以聞令懸

之公堂永爲法守命吏部特簡教授一員誨之
天順丁丑英宗復辟弘緒入覲上召見便殿親
握其手置膝上與語久之賜白金綵帛以弘緒
賜第湫隘易以大第凡南城賞花西苑較獵皆
從親祀郊壇亦與分獻孔公恂景泰朝進士
比殿試聞母疾遂不上知之問禮臣孔公恂
何爲不入對禮臣具實以聞上曰聞疾未有訃
音可召入對遣錦衣賫金牌召之比入日已晡

矣試卷弗及備命禮官賜以紙筆恂條對詳明
賜進士出身服闋擢禮科給事中天順癸未東
宮缺左右詹事員上遂以孔公恂司馬恂超授
少詹事拜命之日上入宮謂孝肅皇后曰朕爲
爾子得二好先生爾知喜乎后問爲誰上曰孔
公恂聖人之後也司馬恂賢人之後也二人故
家後裔且有才名斯授之耳后斂容謝懽宴樂
作夜分始罷中貴喧傳以爲太平美事公恂在

東宮講明聖學開陳善道輔導有成凡三入詹
事稱名臣焉 孔弘泰入朝憲宗見所佩玉帶
遣人問焉泰對曰臣家門故事累朝恩數不敢
廢也再值郊壇上親定命爲分獻及辭歸上曰
卿其進學循禮表率宗族無忝聖裔以副朕懷
孔聞韶襲爵方弱冠陞見儀度秀整稱上意
面賜玉帶麒麟服兼賜制誥曰爾聞韶儒宗正
嫡嗣膺封命茂年美質足紹前休爾尚克勤進

脩永終令譽以副四方之觀禮以光百代之宗
祀武宗改元幸學禮成命坐黼倫堂聽講御賜
回文詩以寵其行

臣毓圻按家傳漢時自褒成君霸至議郎昱歷
東西京爲卿相牧守者五十三人列侯七人自
後宗子之承恩賢達之遇主列朝具有不可勝
載述其尤著若親幸闕里得膺寵眷者漢肅寧
時爲臨晉令僖褒成侯損周太祖時爲曲阜令

仁玉宋真宗時爲侍郎勗文宣公佑司諫道輔
至於釋奠太學講經上頌者則爲唐國子監祭
酒穎達皆輝映家乘以爲美談然求其遭逢之
異禮數之隆則未有過於臣毓圻者臣襲爵時
年甫十二即蒙

皇上召入瀛臺

命坐賜茶問臣年幾何師事何人臣時應對多有失措
皇上曲賜涵容慰勞軫恤

德意優渥嗣後每歲入

朝必蒙

垂問嘗隨

御仗

皇上問臣家傳世緒

諭令嚮學臣自媿愚昧荒落無以仰答

聖恩今恭遇

鑒興臨幸闕里親承

聖諭諄諄訓勉且獲侍

皇上厯覽

廟庭

天顏怡悅

溫旨優容凡有

顧問令臣從容奏對霽堂陛之威嚴等君臣於父子

即虞廷之都兪颺拜成周之來游來歌亦無以

方斯

恩遇之隆匹此

寵光之渥也

臣

敢不夙夜黽勉訓導子姓相與策厲

鈍仰思

祖德以上答

聖恩於萬一耶

幸魯盛典卷九

欽定四庫全書

幸魯盛典卷十

聖駕出承聖門大學士王熙宣

諭曰

聖駕即日幸孔林仍著衍聖公孔毓圻及口北道孔興
洪講書官孔尚鉉孔尚任引

駕於是

上由毓粹門出

御涼輦鹵簿前導經襲封第門

上謂衍聖公孔毓圻曰此爾家耶爾可進去恐人多擁

擠毓圻叩謝

駕遂東過鼓樓北從陋巷街出曲阜城北門萬姓喜見
天顏夾道懽呼有周公後裔東野沛然扶掖其父東野
雲鵬匍匐道左上疏請得以世官奉先廟如四

氏

上曰周公姬姓爾疏稱東野何也沛然奏曰昔伯禽之

季子魚食米於東野因以爲姓

上問周公廟何在沛然奏曰東望高阜松柏鬱然者即

魯公世廟也

上問曰此老人誰也沛然奏曰臣父東野雲鵬年七十

有五特來瞻仰

天顏

上曰爾族衆幾何沛然奏曰族人不及百丁

上覽奏訖付侍衛交部即議前行一里至聖林門

命從臣皆下馬又半里入觀樓門衍聖公孔毓圻等跪迎道左

上顧笑曰爾等已先到此耶毓圻奏曰臣等從間道先來伺候

駕至洙水橋即

命降輦毓圻奏曰此去

先師墓尚遠又引

駕前至墓門

上降輦步入詣

先師墓前北面跪大學士明珠捧金碗酒

上三酹酒畢行三叩頭禮恭親王及諸大臣衍聖公孔
毓圻等皆陪位行禮

附錄 先聖林在今縣城北二里許背泗面洙
林門直縣北門夾道檜樹林地圍徑數里繚以
周垣林中無荆棘鳥巢古木千章多有莫能名
者禮記檀弓孔子之喪有自燕來觀者舍於

子夏氏子夏曰聖人之葬人與人之葬聖人也
子何觀焉昔者夫子言之曰吾見封之若堂者
矣見若坊者矣見若覆夏屋者矣見若斧者矣
從若斧者焉馬鬣封之謂也今日而三斬版
而已封尚行夫子之志乎哉 史記孔子葬魯
城北泗上弟子心喪三年相訣而去子貢廬於
塚上凡六年弟子及魯人從而家者百餘室魯
世世相傳以歲時奉祀孔子 王充論衡曰孔

子當泗水而葬泗水爲之卻流 皇覽曰孔子
冢去魯城一里冢塋百畝冢南北廣十步東西
廣十三步高一丈二寸如鳥卵馬鬣今增周圍
五十步高一丈五尺塋中不生荆棘刺人草樹
以百數皆遠方弟子各持鄉土異種所植惟楷
木爲多餘則柞枌雜離女貞五味薨檀之木也
先聖沒弟子於冢前以瓦甓爲壇方六尺至
漢永壽元年魯相韓勅易之以石方三尺縱橫

各七石上刻出錢人姓名今猶隱隱可見墓前一室東向相傳子貢廬墓處也外有墻垣環之墓之東南爲享殿三間殿前翁仲二左執笏右帶劍石麟石虎四華表二漢永壽元年魯相韓勅建殿之前有門三間門之左爲思堂壁上石刻唐宋時物也有宋真宗駐蹕亭門之前爲泮水水上有橋橋東有輦路路南爲觀樓樓在周垣之上魯故北城也樓南爲林坊扁曰宣聖林

坊之前爲大石坊五洞鐫萬古長春四字萬厯
二十二年建 孔聖全書曰孔子葬魯城北公
西赤爲識注云識音誌後世墓誌之祖 伯魚
墓在先聖墓東稍南相去僅數步墓前有碑鐫
泗水侯墓孔子商人蓋尚右也 子思子墓在
先聖墓南相去數十步墓前有碑鐫沂國述聖
公墓 漢桓帝永壽三年魯相韓勅脩孔子墓
復民吳仲初等若干家給掃除 靈帝建寧二

年魯相史晨置夫子守冢吏四人 宋文帝元
嘉十九年詔曰昔之賢哲及一介之善猶或衛
其土壠禁其芻牧況尼父德表生民功被百代
而墳塋荒蕪荆棘弗剪可蠲墓側數戶以掌灑
掃并栽種松柏六百株 後魏孝文帝太和十
九年幸魯城命兗州起園栽柏脩飭墳壠 唐
明皇開元十三年給近墓五戶灑掃懿宗咸通
四年給灑掃五十戶 周太祖廣順二年幸林

拜奠勅所屬以時脩葺墓所祠宇 宋真宗大中祥符元年帝拜文宣王墓給近便十戶以奉塋域 真宗幸孔林以林木擁道降輿乘馬以後馳道遂名輦路皆甃以石 兗州府誌曰洙水出泰山蓋縣臨樂山西南流於卞城西泗水亂流至魯縣東北分爲二水西北流至孔里又南經瑕邱城東而南入石門又西南經平陽縣又南洸水注之洸水出東平上受汶水於岡縣

西闌亭西南流經盛鄉城又南經寧陽縣城西
又東南流注於洙水按瑕邱石門今府城東金
口壩也 明世宗嘉靖二年御史陳鳳梧重脩
洙水橋創建洙水石坊三架

臣按魯哀公葬孔子於魯城北泗上即所居之
堂立廟歷代致祭咸在廟庭罕有幸林者唯周
太祖詣林再拜勅禁樵採宋真宗親降鑾輿興
嗟展敬寂寥千祀遐哉尚矣雖松楸動色猶存

馳道之碑而典冊靡徵莫悉當時之禮

皇上釋奠告成勾陳式道撫故封於馬鬣愜遺表於龍

蹲降

輦徐行備爵登拜

聖心致慤

聖容有嚴頓使幽壤一杯酌沃

上尊之醞清洙一曲周環七萃之屯宜乎臣庶師儒之

感頌詠歌不能自已也

上瞻仰墓碑問墓上是何草木衍聖公孔毓圻奏曰孔
林草木皆當年羣弟子各自其國徙植種類繁
多不能悉辨其最著楷木著草二種

上問楷木何所用之毓圻奏曰楷木可爲杖又可爲棋
其萌可爲蔬又可爲茶其癭可爲瓢其子榨油
可爲膏燭

附錄 墓碑書大成至聖文宣王墓永嘉黃養
正書 楷木縱橫有紋可爲手板及杖宋濂楷

杖銘云托根兮孔林有紋橫橫兮如玉如金千
載寂寥兮孰白爾扶持之心又銘曰生孔林承
聖澤文庚庚光繹繹扶顛持危資爾德 楷木
一名文木唯孔林及南海有之

上又問有蒼草否取來朕看衍聖公孔毓圻自墓側取
蒼草一莖進呈

御覽

上曰大衍之數五十其用四十有九蒼草一叢五十莖

者以筮方驗今果有否臠圻奏曰林中雖多著草其叢生五十莖者謂之瑞草不能常有今蒙

鑒輿經過瑞草必生有則

臣即馳進

附錄 洪範五行曰著之爲言耆也百年一本

生百莖此草木之壽亦知吉凶者聖人以問鬼神 逸禮曰天子之著九尺諸侯七尺士三尺

淮南子曰上有叢著下有伏龜 說文曰著

蒿屬也生千歲三百莖可以爲卜策 著草唯

產伏羲陵及孔子墓乃靈

上由聖墓西偏至先賢端木賜廬墓處有奉祀生端木
植端木謙跪廬外上疏請得比四氏以博士侍

祠

上問子貢後人何以在此衍聖公孔毓圻奏曰委係端
木嫡支今奉此處香火

上覽奏畢手付侍衛

附錄 廬墓處在聖墓西南後人建堂其上

上過宋真宗駐蹕亭徘徊良久

命侍衛登高遠眺

臣按真宗駐蹕亭在聖墓東南相傳真宗奠謁畢坐此地宣兩府及兩制賜茶見墓傍古碑命詞臣拂蘚辨認此其處也我

皇上躬親至此徘徊憑眺既而行聖公孔毓圻請建皇上駐蹕亭以紀隆遇今建於古亭之南雖

聖德峻極不藉土木之崇閎

神功魏煥不假雕鏤之飾美而氣象崢嶸俯窺前製丹
青炳蔚遠蓋舊觀矣

上見樹上蔓草

親摘一葉問此草何名衍聖公孔毓圻奏曰此名文草
冬夏不凋根葉花實具五色五味

附錄 文草生聖墓上蔓生柔細如絡石葉出
似十字冬夏不凋深秋結子累累五色具五味
得五行之正也

上至楷亭衍聖公孔毓圻奏曰此端木賜手植楷木枯而不朽後人建亭其傍

附錄 古楷在聖林東南享殿後高四丈五尺圍一丈枯而不朽水經注孔子既葬弟子異國各持其土所宜植於墓前此蓋子貢植也

上又問有著草生地上者可更覓一觀衍聖公孔毓圻遂引

駕至楷亭之西岡隴崎嶇榛莽深密披叢指奏曰此即

著草

上親摘一莖玩其枝幹又採子盈掬辨其氣味曰細嗅之亦有異香

上遂親採三株付近侍攜歸又問此大樹爲何木毓圻奏曰此皆橡樹

上笑曰本名櫨樹乃木傍加斗斛之斛

上瞻眺過午出享殿至階下南面立衍聖公孔毓圻等叩頭奏謝大學士明珠王熙等跪奏曰

先師孔子道大德隆為萬世師為百王法然猶有其
德而無位我

皇上德位兼隆

心契聖學

躬備至道作

君作

師以立人極是以尊聖重道典禮隆備度越前古凡
歷代帝王幸闕里者其儀文之盛皆未有如

我

皇上者也

臣

等遭逢

聖明備員扈從不勝欣忭掌院學士孫在豐侍讀學士

高士奇等跪奏曰

至聖之道昭垂萬世而振興文教實賴

一人

皇上躬詣闕里盛舉儀章正以宣揚

聖化烝育羣生凡有血氣莫不感發誠海內嚮風之

金一
卷十
自億載太平之基不獨孔氏子孫感沐

皇恩已也衍聖公孔毓圻等跪奏曰從來臨幸之君但
詣廟庭若幸林則祇有宋真宗已爲古來希觀
之事

皇上祀廟之後

臨御林垌酌酒親拜周覽良久咨訪陳蹟愛及草木仰
見

體道之誠尊

聖之至海隅日出無不感慕興起以副

文明之化不獨臣等忝爲聖裔感戴

高厚之無涯也

上觀亭前石儀翁仲華表角端文豹

附錄 自林門折而西渡洙水橋有石坊其北

即墓門三間門內列石儀華表二角端二文豹

二又名金光獸翁仲二左執笏右帶劍石鼎一

皆宋時造宋宣和五年立石儀碑曰孔子舊墓

無石儀有司請於朝命工鐫造已成委林外汚
泥中一日通判襲慶府王衣衍聖公孔端友與
廟宅族人同議揆日卜地立於宣聖墳前實雅
奉朝廷尊師重道之意也

上於墓門竚立東望問是何所衍聖公孔毓圻奏曰
臣家春秋祭掃族姓燕會之所名曰思堂

上入思堂問壁上有何名碑衍聖公孔毓圻奏曰皆宋
元題名

上周覽訖在堂中南向坐問曰此林周圍幾許衍聖公
孔毓圻奏曰共地十八頃今二千餘年族人日
繁祔葬無所

上曰何不開擴毓圻奏曰

皇上垂問及此

聖恩高厚遠逮

臣

家百世子孫但林外皆版籍民田欲

擴不能尚望

皇上特恩賜給

上曰即具本來毓圻等叩頭謝

恩

上步出思堂升輦出林門即西發幸兗州府衍聖公孔

毓圻等跪送道左是日申刻

命內務府大臣偕禮部尚書介山等於詩禮堂頒

賜

衍聖公孔毓圻五經博士孔毓埏顏懋衡等及曲阜

縣知縣孔興認

日講四書易經書經解義各一部

賜衍聖公孔毓圻狐腋蟒服一領黑貂掛一領表裏各

五疋

賜五經博士孔毓埏等曲阜縣知縣孔興認及四氏子

孫在仕籍者蟒服有差

賜孔氏子孫進士舉人貢生袍服有差

賜孔氏子孫監生生員白金各五兩

賜曲阜縣康熙二十四年地丁銀盡行蠲免

先是內閣等衙門

題爲欽奉

上諭事

臣等伏惟

皇上典學右文崇儒重道紹唐虞之治統接洙泗之心
傳

車駕東巡

躬詣闕里致祭

先師祀禮告成所有應行事宜及頒

賜衍聖公等儀物

命臣等集議者謹議得歷代帝王致祀闕里或親製贊

文及四配十哲命宰相等分撰贊詞勒石廟中
或賜書籍銀幣器皿或榜書御筆或加恩孔氏
子孫不等我

皇上至德在躬尊崇

先聖

睿學緝熙

天章炳煥所有

日講四書易經書經解義應行頒

賜衍聖公曲阜縣知縣及四氏博士等並恭請

御製

先師孔子贊勒碑廟庭或

宸翰刻石或

賜衍聖公

御書至於加

恩賜物出自

聖裁非臣等所敢擅議奉

旨日講四書易經書經解義著翰林院預備賁往賜給
朕所製

先師孔子贊勒石廟中及朕所書字刻石竝賜與衍
聖公書字俱在內頒發其應作何賞賚之處爾等定
議具奏欽此欽遵仰見我

皇上文治誕敷

聖澤弘被

躬行至道學契

先師

寵臨禮義之邦

恩及聖賢之胄光生簡冊喜溢簪紳今臣等議得衍

聖公擬

賜狐腋蟒袍一件貂掛一件裘襖各五疋曲阜縣知縣

五經博士孔氏及四氏子孫名列仕籍者擬

賜羊皮蟒袍各一件蟒綿掛各一件孔氏子孫進士舉

人貢生擬

賜鑲領袖綿緞袍各一件綿緞掛各一件孔氏子孫監

生生員擬

賜銀各五兩曲阜闔縣康熙二十四年地丁銀兩擬

賜恩免

臣

等未敢擅便謹題請

旨奉

旨依議

附錄 漢高祖自淮南還過魯謁孔廟封九代
孫孔騰爲奉聖君 光武東巡詣孔子舊宅賜
酒肉 章帝大會孔氏男子年二十以上者六
十三人令以儒者巾服見賜孔氏男女錢帛留
祭器於廟 安帝幸闕里命孔氏宗族榮以衣
冠悉會賚帛有差 唐高宗詣孔子廟免孔氏
子孫賦役 明皇詣孔子宅詔孔氏子孫並免
賦役 周太祖至闕里詔留所獻銀酒器及爐

於廟中訪孔子四十三代孫孔仁玉爲曲阜令
宋真宗謁先聖廟詔文宣公伯叔兄弟子姪
及孔氏家族長者並許陪位以御香一盒竝銀
爐祭器皆留於廟賜其家錢三十萬帛二百疋
大學士明珠王熙等奏曰臣等叨隨
法駕屢奉

綸音仰惟我

皇上纘承洪緒統御萬方

聖德誕敷遠至邇安興禮樂明教化允釐庶績表章六經至治再見唐虞心傳上接洙泗固已

躬備至德丕揚聖教茲者

臨幸闕里尊尚

先師

萬乘之尊特行九拜禮牲牢樂舞隆舉儀章謁林奠爵
拜跪致敬周覽廟庭車服禮器緬然長想勝書

御筆懸額殿中

聖製詩章

寵錫宗胄撤

鑾儀曲蓋畱置殿庭永光俎豆進生徒於詩禮堂講

說經書宣傳

天語煌煌訓誡頒

賜講筵經書解義及袍服文綺白金蠲復曲阜租徭

曠典殊恩超軼前古漢高之祀太牢明皇經鄒魯賦詩

宋真宗製贊詞畱祭器雖傳爲盛事禮猶闕畧

孰有如今日者哉臣等恭逢鉅典不勝踴躍慶幸之至

孔子六十七代孫太子少師襲封衍聖公臣孔毓圻等康熙二十三年十一月十八日恭遇

聖駕臨幸闕里釋奠

先師臣等四氏子孫赴廟陪祀觀禮

恩賚備至謹奉

表稱

謝者臣等誠惶誠恐稽首頓首上言伏以

聲教誕敷虞廷勤省方之駕

文明震耀漢世隆幸宅之儀

玉輅臨而洙水流光

鑾輿降而尼山煥彩曠典幸逢額蒙罕覩茲蓋伏遇

皇帝陛下

執中布度

得一含真

文武聖神協車書於海濱

寬仁哲惠沛雨露於寰區一統隆無外之規猶

軫民瘼而巡草野萬國仰

同文之治彌尊至道以

御宮牆循過魯詣宅之蹟舉太牢親祀之儀五色彩雲

雙鳳夾爐香而旋繞九天瑞靄六龍護

袞冕以親承隆儀肇舉肅瞻北面之崇雅樂初聞頌習

太常之奏髦士奉璋以景從野老扶藜而觀化

一十四君之駐蹕無此顯懿二千餘載之弘規

始爲峻極

臣

等質慚檮櫟學愧箕裘恭迎

法駕於層霄歡呼相慶親近

天顏於咫尺悚惕靡寧膺

御賜之殊榮率賢裔而沾被

聖恩優渥感戴無涯伏願

念典愈勤

宏文日煥

親接羹牆道脈奚止禮樂三千聿開奎壁光華永奠河
山百二四海傾誠祝地久天長之福萬邦拭目

仰王馳帝驟之勲

臣

等無任瞻

天仰

聖激切屏營之至謹奉

表稱

謝以

聞

幸魯盛典卷十